

DEO OPTIMO, MAX.  
UNI ET TRINO,  
VIRGINI DEIPARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,  
QUOD LIBETARIIS DISPUTATIONIBUS,  
*manè discutienda, in Scholis Medicorum, die Jovis,  
decimâ-quartâ Februarii, 1726.*

M. JOANNE-FRANCISCO LEAULTE',  
Doctore Medico, Præside.

*An Rheumatismo Balneum?*

I.

**P**RÆFIXUS à Deo Optimo, Maximo, vitæ terminus, Medicinæ necessitatem non excludit. Ut cæteras vitæ necessitates, sic Medicinam creavit Altissimus, non ut hominem ad immortalitatem duceret, sed ut mortalitatis suæ fragilitatem, infirmitatemque relevaret. Quos enim absolute morbos Medicina non sanat, eos tamen tolerabiles reddit & vitales. Imò contumaces affectus, & qui validioribus remediis refragantur, adhibita Medici industria, mitioribus nunquam cedunt. Hujus indolis esse Rheumatismum contumacem puta; modò hoc, modò illud latus, improvise insultu occupat, sine rubore, aut tumore, lancinantes pungentesque dolores excruciant, morborum genus omne dices in membranaceas musculosasque partes illapsum. Hinc perpetuâ naturam pugnâ fatigat; nec priùs quiescit, quàm sedem fixerit stabilem. Non medios artus tantùm, sed & externum corporis habitum infestat, vagos ac succedaneos inferens dolores scorbuticorum, & eorum qui à lue venereâ excitantur, æmulos. Indè tres hosce morbos confundere periculum est. Heu quot videas contumaci, sed simplici Rheumatismo laborantes, inquieto mercurio, sordidis frictionibus, abominatissime salivationibus fuisse damnatos, id facinoris audente luci studio ac temeritate. Magna est inter Arthritidem & Rheumatismum consensio & conspiratio. Hic sæpè illius prodromus, lubricus hujus in illam transitus, communis utriusque materia, idem doloris aculeus, interdum eadem pars affecta. Distinguuntur tamen: hic circuitu caret; illa certis intervallis quasi ex conditio recurrit; lancinantur articulorum ligamenta aut membrane quarum sensus est exquisitus. Adde doloris impatienciâ dolorem acuit, ut jure hanc dicas arti-

colorum febrem. In Rheumatismo verò totum riget doletque corpus; ac si foret Arthritis universa, musculares membranas omnes desultorio dolore vexat, nec ullibi locorum desidet, ita ut non pauciora sint sup-  
 plicia quàm membra.

## I I.

**I**N Rheumatismo caput, ut veteribus placuit, potius quàm Hepar, Lienem, Ventrículum, aut alia viscera inculcare, receptiori ac eruditiori Physicæ obsoletum visum est. Communis est causa quæ plures morbos efficit, sede suâ & parte quâ stagnat humor, & congeritur, propriisque symptomatis, quivis affectus discernitur. A stagnante sanguine pars aquea seu serum faciliè secedit. Serum, non roshaltuosus, dulcis & lymphaticus quo humescunt partes, & flexiles conservantur, sed serum impurum & inconditum, pluribus particulis salinis sulphureisque confusum, auctiore vasorum vi systalticâ, & arctiore partium motu tonico, ploratus & lacrymarum instar expressum. Serum ideo acerrimum sæpè & corrosivum. Serum denique, aut potius serosa colluvies varii ac multiplicis morbi causa proxima & immediata, nerveis & membranaceis partibus maximè inimicatur. In cerebri membranis hemieranias, cephalalgias, convulsiones parit, in intestinorum tunicis dolores colicos, lethiferas cardialgias in ventriculi substantiâ, in aurium meatu severissimam otalgiam, odontalgiam gravissimam in dentium ligamentis, in articulorum membranis dolores arthriticos, Rheumatismos demum contumaces in membranaceis musculorum partibus sine rubore ac tumore creat, at non sine dolore atrocissimo. Serosæ colluviei particulæ quò plus intrâ fibrarum interstitia commorantur, eò falsiores evadunt, acriores & duriores, nec-non totidem cunctorum speciem induunt, quibus fibræ membranacæ eroduntur, & ab invicem divelluntur. Hæ verò stimulatæ & laceffitæ crispantur magis & contrahuntur, serum vicissim premunt, trudentque, & loco cedere compellunt. Interdum resistit serum partibus inhærens tenacius, sæpius in aliam partem fertur ad priorem locum postea reversurum. Hinc Rheumatismi frequens à parte in partem itus reditusque. Hinc remissiones huius mali, & exacerbationes quæ sunt eò frequentiores & longiores, quò plus in illius curatione delinquitur. Si enim minùs peritè tractetur, non ad menses tantùm, sed ad annos aliquot, imò per omnem vitam, miserum discruciat.

## I I I.

**R**HEUMATISMUS contumax curatu difficilis. Causa huius morbi vix corrigi & evacuari potest; tum quod extra circuitus sanguinis orbitam consistat, & ab excretoriis viis quàm longissimè distet; tum quia membranarum fibris ita interjecta est, ut cum ipsis quasi ferruminatam esse putandum sit. Venæ sectio *phlebotomia* in omnibus serè morbis præsidium, quæ in recenti Rheumatismo, cum humor serosus adhuc flexilis est, & vasis faciliè potest resorberi, sola serè curationem absolvit, in inveterato & contumaci vix est paregoricum & præparans, minimè verò sanans remedium. Imò si crebrius aut copiosius fundatur sanguis, Rheumatismus contumax ingravescit; fibrarum nempe debilitas succedit, quæ novos deficiente succos ad se invitet; huc, illuc, irrumpet deflexus succus, dolores omnigenos pariturus. Neque felicius quid à purgatione expectaveris: in dolore Rheumatico sæpè temerè, sæpius insautè exhibetur. Ab hu-

moris foco ad intestinorum glandulas longior est, ac per invia purgantibus loca, tractus. Purgatio itaque in omni Rheumatismo rara sit & circumspectissima. Diuretica fortè adhibebis medicamenta, quibus ferrosa colluvies veluti manu deduci possè tibi videbitur; amara eliges apozemata adeo solemnia hodiè & usitata, quæ pro more condies sale mirabili, & micâ aliquâ indefiniti illius remedii, *Kermès* dicti, stimulas. At nulla sunt fortè in re medicâ, potentioribus diureticis, incertiora remedia. Humores reverà fundunt, & liquant, huc & illuc præceps adigunt, detruduntque in penitissimos corporis recessus, & ad incernicula non sua, ad renes vero ne guttam quidem urinæ sæpè determinant. Sed sudoriferorum, inquit, in hisce morbis magna vis & potentia; hæc populus garrit scilicet, hæc est Medicastrorum cantilena, quam recantent, sitandem possunt sapere, qui sudorem in Rheumatismo vi expressorum damna & calamitates quotidie experiuntur. Cum etiam spontanei sudores morbum hunc exacuere & contumaciorem facere solent. Nam discussâ tenuiori colluviei portione, crassior superabit, novos denuò & graviores dolores proditura. Hæc autem incommoda à balneo ritè temperato ne metuas.

## I V.



U<sup>t</sup> aquæ dotes & qualitates noscit, balnei utilitates prædicare non dubitet. Quam sanitati tuendæ ac restituendæ aqua conferat causariis & revalescentibus notum est. Quantum digestionem alimentorum juvet, testatur imprimis absthemiæ edacitas. Aqua sive pota sive perfusa omni œconomix animali idonea est & amica, cum humoribus corporis nostri misceri facile potest, estque naturæ ferè consimilis, crassa tenuat, liquat glutinosa, dura emollit, tensa laxat & rigida, cæcos referat partium meatus, aperit invia cutis spiramenta, quibus patentibus humorum fuligines liberè elabuntur: quin & ubi corporis penetralia penitus subiit, torridos, concretos, contumacesque succos, quibus se permiscet, lenit, diluit, dissolvitque, & ad exitum parat: ex his judicandum quàm acceptum sit balneum peripneumoniacis, pleuriticis, colicisque doloribus. In balneo positum nephentes. Ischuriâ ab inflammatione laborantibus & ictero sædatis præsentaneum est remedium. Quantæ apud Hippocratem existimationis esset, petiti ex balneis remedium vide. Balneum, inquit, quod compactum est dissolvit & discutit, dolorem lenit, sputumque maturum facit ac educit, facilem reddit spirationem, lassitudinem eximit, dum articulos & cutis superficiem exolvit, & urinam ciet, & capitis gravitatem solvit, & nares humectat. Hactenus Hippocrates qui cum balneo lassitudinem eximi articulos & cutis superficiem emolli pro-nuntiavit, balneum in Rheumatismo adhibendum, posteros omnes edocuisse, cuius sapienti videbitur.

## V.



A<sup>L</sup>NEAS natura vel ars dissimili ratione temperat, naturales calidæ sunt & sulphuræ, thermæ dictæ; de genere sunt fortium pharmacorum, quæ si non in alexiteria, sæpè transeunt in venena. Nam thermarum usus etsi Rheumaticos quosdam sanavit, sexcentos multò deteriores reddidit. Experienciâ constat Balnea calida & sulphurea, quas accensi in sinu terræ sulphuris, bituminis, vi-

trioli, calcis vires hauserunt, eas corporibus nostris non solum insinuare, sed etiam in corpore humano salinas, aliasque morbidas quæ intra viscera aut humores scatent, particulas evolvere, atque in genus nervosum & membranaceum urgere, quin imò secretas prius & otiosas conjungere, & in *Zyuum* quamdam incitare. Quare Rheumatici à thermarum usu sæpissimè morbi fructus in se statim multiplicari sentiunt, ac non rarò in convulsiones inducuntur. Balnea quæ in Rheumatismo ars parat, quò simpliciora sunt, eò sunt efficaciora: in eo nempè morbo rigida mollire, laxare tensa, glutinosa resolvere, macerare salina, sulphurea temperare operæ pretium est; quibus exequendis nullum præsentius & efficacius tibi est remedium quàm aqua dulcis, ex earum genere quæ tenues sunt, lymphidæ, profluentes & apertæ, non limosæ non stativæ, non palustres. Domesticum Balneum fluviali præstat: nam solis æstus ad temperationem aquæ, aut parum efficax, aut nimium inæqualis. Non algido utere Balneo aut præcalido, altero nempè cutis ostiola constringuntur, obturantur, altero laxatis plus æquo meatibus, tenuissimæ feri particule evaporant ultrò, spissescit sanguis, durefcit, cornescit ferè, sitque in vasis veluti solidum in solido. Calore blando debet Balneum tepescere, ita ut neque rigeat æger, neque nimium incalescat: itaque venæ sectio in Rheumatismo contumaci juvat interdum, sed non sanat. Purgantia, qui in primis viis nidulantur, aut ad excretionem proni sunt & propinqui, succostantum deducunt, ceteros non attingunt aut firmitus oculis suis affigunt. At Balneum est veluti totius corporis substantiæ remedium, namque ab illius superficie ad ultimos omnes ejus recessus penetrat, humores in carceribus fibrarum detentos resolvit, laxat fibras, redonatque suo motu tonico; redduntur fluidis pronitates, oscillationes solidis, utrisque æquilibrium. Solitæ humorum determinationes redeunt, secretiones, excretiones.

*Ergo Rheumatismo Balneum.*

Domini Doctores disputaturi.

<i>M. Franciscus Bailly.</i>	<i>M. Petrus-Antonius Lepy,</i> Consiliarius Regis, & in ejus Castellato Med- icus Ordinarius.	<i>M. Joannes-Baptista Mongin, Pharmaciæ</i> Professor, & Medicus Regis Ordinarius.
<i>M. Andreas Delaleu.</i>	<i>M. Elias Col de Vilars,</i> Consiliarius Regis, & in ejus Castellato Med- icus Ordinarius.	<i>M. Michael Procope Conteaun.</i>
<i>M. Antonius le Moine.</i>	<i>M. Henricus Besnier.</i>	<i>M. Joannes-Claudius-Adrianus Helvétius, Re-</i> gi à sanctionibus Consilii, Medicus Regis, perpetuò Ordinarius, & è Regiâ Scientiarum Academiâ.

Proponebat Parisiis BERNARDUS DE JUSSIEU, Lugdunæus,  
Baccalaureus Medicus, in Horto Regio Botanices Prodemonstra-  
tor, & è Regiâ Scientiarum Academiâ.

*Typis PH. N. LOTTIN, Saluberrimæ Facultatis Medicinæ Typographi.*